

## সবজাতীয় ভাষা বিভাগ (একাঙ্কিকা)

বারেন ত্রিপুরা

দৃশ্য : পর্দা সরে গেলে দেখা গেল স্টেজের এক কোণায় নড়বড়ে একটি টেবিল আর সে টেবিলের ছ'ধারে সামনা-সামনি সাজানো ছ'টি ভাস্কর্য-চোরা চেয়ার। মাথায় একটি আধপুরান সাহেবী টুপী, পরণে অসম্ভব ঢিলে-ঢালা ফুল-পেট এবং গারে রঙ-বেরঙের একটি অদ্ভুত কামিজ পরে এক ভদ্রলোক হস্তদস্ত হয়ে স্টেজে প্রবেশ করলেন। কাঁধে একটি তানপুরা আর <sup>বসানে</sup> ~~কানপুরা~~ ইয়া মোটা একটা ফাইল। তিনি স্টেজে এসে তানপুরা এবং ফাইলটি টেবিলে রেখে দর্শকদের উদ্দেশ্যে বলতে থাকেন—

গুডমর্নিং ; নমস্কার ; আসসালামু আলা-ইকুম ! আপনারা আমাকে চিনতে পারছেন না বোধ হয় ? তা চিনবেনই বা কেমন করে ? জন্ম আমার বাংলাদেশে হলেও জীবনের বেশীর ভাগ সময়ই আমার চীন, জাপান, যুক্তেন, ফ্রান্স, রাশিয়া, আমেরিকা বিভিন্ন দেশে মহাদেশে ঘুরতে ঘুরতেই শেষ হলো। কেন এত ঘোরা-ঘুরি যদি জিজ্ঞেস করেন তবে বলবো একমাত্র বিজ্ঞা অর্জনের জন্যই আমার এত ছোট্টাছুটি। লোকে বিজ্ঞা শিখে পি-এইচ,ডি, ডিগ্রি নেয় আর আমি বিজ্ঞা শিখছি শ্রেফ জ্ঞানের জন্য। দেশ-বিদেশের কত ইউনিভার্সিটি যে হেলায় পার হয়ে এলাম তার কি ইয়ত্তা আছে ! কত নামী দামী লেখকের বই আমার একেবারে

মুখস্থ, কণ্ঠস্থ, ঠোঁটস্থ আছে কি আর বলবো। এই ধরন না—ওয়ার্ডস্‌ওয়ার্থের হ্যামলেট, শেক্স-পীয়ারের ওডিসি, ইমাম গাজ্বালীর শাহনামা, প্লেটোর ডাস-ক্যাপিটাল, রবি ঠাকুরের দেবদাস, শরৎ বাবুর নক্সী কাঁথার মাঠ, এই আরও কত কি। তবে যত বই পড়লাম—কাল' মার্কসের রোমিও জুলিয়েট বইটা সত্যিই পড়ার মত বই। কিন্তু, তাই, এতো দেশ-বিদেশের কথা। নিজের দেশের কথা ভাবলে (একটু ধরা গলায়) হুঃখে আমার বুক কেটে যায়। কি করলাম দেশের জন্যে ? তাই প্রিয় কবি নজরুলের ভাষায় বলতে ইচ্ছে করে (অশ্রু ভারাক্রান্ত মনে) 'আশায় চলনে ভুলি কি ফল লাভিলু হয়।' (বুক পকেট থেকে ত্রিকোণাকৃতি একটা রুমাল বের করে চোখ মুছে)। নিজের দেশের লোক-দের কথা কিছুই জানলাম না ! তাই আজ আপনাদের কাছে এসেছি আপনাদের বৈচিত্র-ময় জীবন এবং সংস্কৃতি সম্বন্ধে জানতে এবং গবেষণা করতে। ইনশা-আল্লাহ আমি আপ-নাদের সাহিত্য ও সংস্কৃতিকে বিশ্বের দরবারে তুলে ধরবই। (টেবিলের উপর থেকে তান-পুরাটা হাতে নিয়ে) আর এই কানপুরার সাহায্যে আমি আপনাদের টিপিক্যাল উপজাতীয় সুর সাধনা করবো। ও-হা, আমার এই কানপুরা বাবাজী সম্পর্কে কিছু বলা দরকার। আমার এবং আপনাদের ক'টি করে কান আছে ? ছ'টি

না? কিন্তু এ বাবাজীর এক-দুই-তিন-চার; চারটে কান। অর্থাৎ কিনা ডবল কান আছে। তাই ওস্তাদেরা এ বাবাজীর নাম দিয়েছেন কান-পুরা। মানে—কানে পুরা। গামা, ভুলু, জো-লুই এমনকি মোহাম্মদ আলীর মত বড় বড় ওস্তাদেরাও এ বাবাজীকে নিয়ে সুর সাধনা করেন। আমরাও খুব ইচ্ছা—উপজাতীর ভাষা শিখার পর এ বাবাজী কানপুরার সাহায্যে এখানকার টিপিক্যাল সুরের সাধনা করবো। আশা করি আপনারা আমাকে এ মহৎ কাজে সাহায্য করবেন।—

[এমন সময় একজন মারমা মাথায় পাগড়ী, মুখে চুরুট, গায়ে বামিজ জামা নিয়ে হাজির। তিনি এসেই ৩/৪ ইঞ্চি লম্বা, মোটা চুরুটটি খুঁতু দিয়ে নিভিয়ে কানে গুঁজার পর হাত জোড় করে বললেন]—

মারমা - চিকোবাইয়া!

সবজাঙ্গা—(কিছু বুঝতে না পেরে) কি ভাই কি?

মারমা— চিকোবাইয়া

স: জা:— মানে?

মারমা— মানে নমস্কার

স: জা:—(খুশী হয়ে) চিকোবাইয়া ভাই চিকো-বাইয়া।(সামনের একটা চেয়ার দেখিয়ে) বসুন। আপনি বোধ হয় এ জিলার উপজাতি?

মা:— হাঁ।

স: জা:—কোন উপজাতির লোক?

মা:—আমি ভাই মারমা উপজাতীর লোক।

স: জা:—মারমা!

মা:— শুনে অবাক হয়ে গেলেন মনে হয়?

আপনারা আমাদেরকে মগ বলে চিনেন। ঐ বিদঘুটে শব্দটি আমরা এখন বর্জন করেছি— যাক, শোনলাম, আপনি নাকি আমাদের ভাষা শিখতে এসেছেন?

স: জা:— হাঁ ভাই, তাই। আমি আপনাদের ভাষা শিখবো, গান শিখবো, লোক-গীতি—যা যা আছে সব শিখবো। আশা করি আপনারা আমার সাহায্য করবেন?

মারমা— বিলক্ষণ, আপনি আমাদের ভাষা শিখবেন এতো আনন্দের কথা। সাহায্য করবো না কেন। কি সম্পর্কে জানতে চান বলুন। (এমন সময় বাইরে একটা তোতাপাখী ডেকে উঠলো)

স: জা:—আরে, এখানে তো বেশ তোতাপাখী আছে দেখছি! আচ্ছা—ভাই, আপনারা তোতাপাখীকে কি বলেন?

মা:— কী।

স: জা:— ও! বুঝেন নি? (বোঝানোর ভঙ্গীতে) তোতাপাখী মানে এক জাতীয় পাখী। দেখতে সবুজ, এই পাহাড় অঞ্চলেই বেশী থাকে। (হাতের পাঁচ আঙ্গুল জড়ো করে টিয়ার ঠোঁটের মত আকৃতি করে) এই—এ রকম লাল রঙের ঠোঁট আছে। এবার বলুন তো ওটাকে কি বলে?

মা:— (একটু জোরে) কী, কী।

স: জা:— (স্বগত) সবনাশ! লোকটা আমার কথা বুঝতেই পারলো না। (প্রকাশে একটু রাগত স্বরে) তোতাপাখী

দেখেন নি? এ পাহাড় অঞ্চলে থেকে  
ও তোতাপাখী চেনেন না? আপনি  
কেমন ধারা লোক?

মা:— (চেয়ার ছেড়ে দাঁড়িয়ে রাগতস্বরে)  
চিনবো না কেন, মশাই। আপনি দেখছি  
বড় পাগল! কিছুই বুঝেন না। আমরা  
মারমা ভাষায় তোতাপাখীকে “কী”  
বলি। বুঝেছেন?

স: জা: (অপ্রস্তুত হয়ে) ও,—তাই নাকি।

মা:— আপনার মত আধ পাগল। লোকের দ্বারা  
গবেষণা টবেষণা কিছুই হবে না। অনর্থক  
আমার সময় নষ্ট করলাম। আচ্ছা, চলি  
ভাই। চিকোবাইয়া (প্রস্থান)।

স: জা:— (বগতোক্তি) ইস্! সোজা কথাটি  
বুঝতেই আমার এত দেরী হয়ে গেল!  
(রাগে মাথার চুল টেনে) লোকটিও  
দেখি চট করে রেগে হুট করে চলে  
গেল! আমাকে কথা বলার সুযোগ-  
টুকুই দিলেন না। (হতাশ ভঙ্গিতে  
চেয়ারে বসে পড়লেন)।

(ঠিক এমনি সময় খুতিপরা একজন ত্রিপুরা  
প্রবেশ করলো। মাথায় তার পাগড়ী বাঁধা,  
আর কাঁধে একটা থলেতে দোতারা ঝোলানো)।  
ত্রিপুরা— (নমস্কারের ভঙ্গিতে) খুলুম্খা।

স: জা:— খুলুম্খা! সে আবার কি? আপনি  
কে ভাই?

ত্রি:— ‘খুলুম্খা’ মানে নমস্কার।

স: জা:— (প্রতি নমস্কার জানিয়ে) ও—, খুলুম্খা  
ভাই, খুলুম্খা। আমি তো মনে  
করেছিলাম ‘খুলুম্-খা বলে আপনি

হয়তো কিছু খেতে বলেছিলেন। তা  
কি মনে করে এলেন?

ত্রিপুরা— শুনলাম আপনি নাকি আমাদের  
ভাষা শিখবেন এবং এ কারণেই নাকি  
এখানে এসেছেন। ঠিক নাকি?

সবজ্ঞাস্তা— একশ’বার ঠিক। এ কারণেই তো  
আমার—এখানে আসা। তা ভাই  
আপনি কোন্ উপজাতির বলুন তো?

ত্রি:— আমি ত্রিপুরা।

স: জা:— কি? কি-পুরা বললেন? আমার কান-  
পুরাটার কথা বলছেন? ওটা বাজাতে  
চান নাকি?

ত্রি:— আরে না—না; তানপুরার কথা কখন  
বললাম। আমার তো বাজানোর জ্ঞান  
দোতারাই যথেষ্ট।

স: জা:— তবে যে কি একটা পুরা বললেন।

ত্রি:— বলছি আমি ত্রিপুরা, মানে ত্রি-পু-রা  
উপজাতির লোক, আপনারা অনেক সময়  
‘টিপু-রা’ ও বলেন, এই বলে সবজ্ঞাস্তার  
অজ্ঞাতে তিনি দোতারায় সহ ষলেটা  
তান-পুরাটার উপর রাখলেন)।

স: জা:— (একটু লজ্জিত হয়ে) তাইতো! আপ-  
নাদের কথা অনেক বইয়েই দেখেছি।  
ভারতে তো ত্রিপুরা নামে একটা  
রাজ্যও আছে। (হঠাৎ কানপুরাটার  
উপর দোতারায়টা দেখে) এটা কার?

ত্রি:— আমার।

স: জা:— আচ্ছা, ভাই, ‘আমার’ শব্দটিকে  
ত্রিপুরা ভাষায় কি বলেন?

ত্রি:— (চেয়ারে বসতে গিয়ে জুংসই না হওয়ার  
একটু দাঁড়িয়ে) ‘আনি’।

সঃ জাঃ— না, না, কিছুই আনতে হবে না।  
ভুলেই গেছিলাম, আপনাকে আমার  
প্রথমেই বসতে বলা উচিত ছিল। তা  
ভাই—‘আমার’ শব্দটিকে আপনারা  
কি বলেন?

ত্রিঃ— (জোরে) আ-নি-।

সঃ জাঃ— (আবার একটু অপ্রস্তুতের মত হয়ে)  
না—না, কিছু আনতে হবে না। শুধু  
বলুন ‘আমার’ শব্দটাকে কি বলেন?

ত্রিঃ— (একটু বিরক্ত হয়ে) আনি, আনি।

সঃ জাঃ— ওই যা, আপনি দেখছি আমার কথা  
বুঝলেনই না।

ত্রিঃ— (রেগে) বুঝে না কেন? আপনিই  
আমার কথা বুঝছেন না। শোনার ধৈর্য  
পর্যন্ত আপনার নেই, তা শিখবেন কি?  
আমাদের ভাষায় আমরা ‘আমার’ শব্দ  
টাকে ‘আনি’ বলি, বুঝছেন মশাই?  
একটা কথা, বোঝাতে যদি এতক্ষণ লাগে  
তবে তবে শিখবেনই বা কি? ঈস,  
গোটা দিনটাই আমার মাটি হয়ে গেলে  
(প্রস্থানোত্তত)।

সঃ জাঃ— (হাত ধরে ধরে অবস্থার) বসুন ভাই,  
বসুন।

ত্রিঃ— না—না, আমার আর বসা-বসিতে কাজ  
নেই, আমি চললাম। খুলুম্খা (প্রস্থান)।

সঃ জাঃ— হায়রে, পোড়া কপাল আমার (কপালে  
হাত দিয়ে)। এরা দেখছি অযথাই  
আমার উপর বিরক্ত হচ্ছে। নাজানি  
শেষ-মেঘ কি হুর্গতিই না আছে  
কপালে।

এমন সময় একজন লুসাই মাথার বেতের  
টুপী, পরনে নিজ তাঁতে বোনা কাপড়ের প্যান্ট  
সার্ট, মুখে একটা নিজস্ব তৈয়ারী সিগারেট  
নিরে প্রবেশ করলেন।

লুসাই— (সহাস্যে হাত বাড়িয়ে) চি-ভাই!

সঃ জাঃ— (স্বগত) এ আবার চিঁচিঁ করে কি  
বলতে চায়? (প্রকাশ্যে) কি, ভাই?

লু— চি-ভাই!

সঃ জাঃ— মানে?

লু— শুড্ মনিং।

সঃ জাঃ— (আনন্দে লাফিয়ে উঠে) চি-ভাই,  
চি-ভাই! আপনিই একমাত্র আমার  
কথা বুঝতে পারবেন। বসুন, বসুন।  
আপনি কোন উপজাতির লোক?

লু— (উপবেশন পূর্বক) আমি লুসাই।

সঃ জাঃ— ও, আচ্ছা। (সিগারেটটি দেখিয়ে)  
আপনার সিগারেট তো বেশ চমৎ-  
কার। এটাকে কি বলেন?

লু— ‘ভাই লও’।

সঃ জাঃ— না—না, নেব কেন? আমার তো  
সিগারেট আছে। (এই বলে পকেট  
থেকে এক প্যাকেট সিগারেট বের  
করে টেবিলে রাখলেন) এবার বলুন  
সিগারেটকে কি বলেন?

লু— ‘ভাই লও’।

সঃ জাঃ— সত্যিই বলছেন?

লু— (ছাই ঝাড়ার জন্য সিগারেটটা একটু  
বাড়িয়ে) সত্যিই বলছি, ‘ভাই লও’।

সঃ জাঃ— আপনাকে নিয়ে আর পারা গেলনা।  
এত করেই যখন বললেন—না নিলে

শেষ মেঘ আবার হঠাৎ বজ্র হবেন  
(এই বলে লুসাই ভদ্রলোকের হাত  
থেকে সিগারেট নিয়ে লম্বা টান  
দিলেন)। হেঁচু-হেঁচু ... ..  
বাবা! কি বিদ্যুটে গন্ধ!! (সিগা-  
রেট ছুঁড়ে ফেলে) ওয়াক থুং, থুং, কি  
বাজে সিগারেট আপনার! ভাল  
সিগারেট খেতে পারেন না?

লু— আমার সিগারেট বাজে নয় আপনিই  
বাজে লোক। বলা নেই কওয়া নেই, তট  
করে আমার সিগারেটটা ছোঁ মেরে নিয়ে  
নিলেন?

স: জা:— আমাকে বলছেন বাজে লোক?  
'ভাই লও' 'ভাই লও' বলছেন বলেই  
তো নিলাম। অমন বাজে সিগারেট  
আমি জীবনেও খাইনি। (মুখটা  
বিকৃতি করে)।

লু— যথেষ্ট হয়েছে। আপনার বিজ্ঞার দেড়  
কতটুকু আমার জানা হয়ে গেছে। বললাম  
সিগারেটটাকে আমরা ভাই লও' বলি।  
আর আপনি মনে করেছেন আমার সিগা-  
রেটটা আপনাকে নিতে বলেছি। দিলেন  
তো আমার সিগারেটটা নষ্ট করে।

স: জা:— সরি, ভাই সরি। খুবই হুঃখিত!  
(ভাড়াভাড়া নিজের সিগারেট প্যাকে-  
টটা এগিয়ে দিয়ে) ঠিক আছে.  
আপনি আমার পুরো প্যাকেটটাই  
নিন।

লু— (একটু রাগতস্বরে) রাখেন আপনার সিগারেট  
আমি চললাম (প্রস্থান)।

দৃশ্য— সবজাস্তা মাথার হাত দিয়ে হতাশ  
ভঙ্গিতে বসে পড়েন। কতক্ষণ পরে

মাথার উপরে খোঁপা বাঁধা, ~~কল্যাণ~~ পাখীর  
পালক গুঁজানো, কপালে রঙ-বেরঙের  
হুঁটি লম্বা দাগ নিয়ে খালি গায়ে একজন  
ম্রো ঢুকলো।

স: জা:— কি ভাই, কাকে খুঁজছেন?

ম্রো চুঃ চুঃ!

স: জা:— (লজ্জিত হয়ে) হুঃখিত! আমি মনে  
করেছিলাম আপনি আমার এখানে  
এসেছেন।

ম্রো— আমি আপনার কাছেই তো এলাম।

স: জা:— তবে যে 'চুপ' 'চুপ' বলছেন!

ম্রো— কখন বললাম?

স: জা:— এইতো একটু আগে 'চুপ' 'চুপ' না  
কি একটা বললেন না?

ম্রো:— ও, চুঃ চুঃ, মানে নমস্কার।

স: জা:— (একটু লজ্জিত হয়ে) ও! ভাই  
নাকি! চুঃ চুঃ ভাই, চুঃ চুঃ। বসুন।  
এবার বলুন কেন এলেন?

ম্রো:— শুনলাম আপনি নাকি এখানকার ভাষা  
শিখতে এসেছেন?

স: জা:— হ্যাঁ, ভাই। আপনি কোন্ উপ-  
জাতির?

ম্রো:— আমি ম্রো:।

স: জা:— ম্রো:! ও বাবা! (অসম্ভব সহ-  
কারে) আপনাদের তো ইয়া লম্বা  
বাঁশী আছে। ছবিতে অনেক দেখেছি।  
আমি আপনাদেরই খুঁজছিলাম। এই  
দেখুন না (তানপুরাটা দেখিয়ে) আমার  
কানপুরা, এটা দিয়েই আমি আপনা-  
দের টিপিক্যাল সুরের গবেষণা করবো।  
আপনাদের বাঁশীর সাথে পালা দিয়ে

আমরা কানপুরা বাজাবো।

ম্রো:— সে তো খুব ভাল কথা

স: জা:— (উৎসাহের সাথে তানপুরাটা  
হাতে নিয়ে) আচ্ছা ভাই ম্রো, এখানে-

তো দেখছি অনেকে খোঁপার পাখীর পালক  
গুঁজে। (ত্মোর খোঁপার দিকে অঙ্গুলি নির্দেশ  
করে) আপনি কোন পাখীর পালক গুঁজেছেন?

স: জা:— খুব ভাল কথা তো; আপনারা ভীম-  
রাজকে আপনাদের ভাষায় কি বলেন?

ত্মো:— বাজুন।

স: জা:— কি বললেন?

ত্মো:— বাজুন (সহাস্যে)।

দৃশ্য— সবজাস্তা তানপুরাটা নিয়ে বাজাতে লাগ-  
লেন—ড্রিম—ড্রিম—ড্রিম………ড্রিম।

স: জা:— (কিছুক্ষণ বাজানোর পর) এবার বলুন,  
ভীমরাজ পাখিকে আপনারা কি বলেন?

ত্মো:— বাজুন! বাজুন!!

স: জা:— কত আর বাজাবো, ভাই। আমার  
অনেক কাজ আছে, আর একদিন  
বাজিয়ে শোনাবো।

ত্মো:— ওই—যা, কিছুই আপনাকে দিয়ে  
হবেনা। আমি বলছি কি—ভীমরাজ  
পাখিকে আমাদের ভাষায় ‘বাজুন’  
বলি। আর আপনি দেখছি না বুঝে  
তানপুরাটা বাজাতেই আছেন! তাও  
বদি ভালো হতো!

স: জা:— (ব্যস্ত হয়ে) ঠিক আছে, ভাই, ঠিক  
আছে। আপনাকে বরং ভাল একটা  
উচ্চাঙ্গ সঙ্গীত মানে খেয়াল শোনাই?

ত্মো:—ওসব খেয়ালী লোক আমি নই। আমি  
কাজের লোক। আপনার খেয়াল  
নিষে আপনি থাকুন; আমার কাজে  
আমি চললাম। চু: চু:। (প্রস্থান)

স: জা:— (হতাশ ভঙ্গিতে) কি কুক্ষণেই না আমার  
এখানে আসা হয়েছে। একে একে  
সবাই যেন আমার উপর বিরক্ত হচ্ছে।  
তবে কি এখানকার ভাষা শেখা হবেনা।  
আর কি দরকারহ বা আছে বাবা এত  
কষ্ট করে উপজাতীয় ভাষা শেখায়।  
বিশেষ করে যেখানে দশ বারটা ভাষা  
এলাহী কাণ্ড! আমার দ্বারা অতবড়  
কর্ম সম্ভব নয় বাপু। এর চেয়ে মানে  
মানে সরে পড়াটাই চের ভাল!

(সবজাস্তা জিনিসপত্র গোছ গোছ করতে  
থাকেন। টুপীটা এক হাতে বুকে জড়িয়ে অন্য  
হাতে ফাইলটি কাঁধে নিতে নিতে কি মনে করে  
আবার বগলে ঢুকালেন। তারপর তানপুরাটাও  
তুলে বগলে ঢুকাতে যাচ্ছিলেন কিন্তু শেষ পর্যন্ত  
কাঁধে তুলে নিলেন। এমন সময় সাদা ধুতি  
জামা পরা কোমরে গামছা বাঁধা অবস্থায় একজন  
লোক প্রবেশ করলেন। সবজাস্তা তা খেয়াল  
করেন নি।)

চাকমা—জু-জু!

সবজাস্তা—(চমকে উঠে—একটু ভীত হয়ে)  
না—না, ভাই, আমি জুজুংসু জানিনা।

চাকমা—জু-জু!

স: জা:—(ভীত হয়ে—একটু ভোক্তলাতে থাকে)  
মা—মাপ করবেন ভাই! আমি জীবনেও  
জুজুংসু খেলিনি।

চা—আপনিই গবেষক মহাশয় নাকি?

স: জা:— হ্যাঁ, ভাই। আমি সর্বাভিদ্যায় বিশারদ  
হলেও জুজুংসু জানিনা। আপনি  
কি জাপানী যুদ্ধরু থেকে এসেছেন?

চা—না তো আমি এখানকারই লোক। জাতে  
চাকমা বা চাঙমা!

স: জা:—ওহ্ আপনি চাকমা! তাই বলুন!  
আমি ভাবছিলাম আপনি কোন  
জাপানী, জুজুং খেলতে এসেছেন।

চা—(যুগ্ম হেসে) 'জুজু' মানে নমস্কার।

স: জা:—(উচ্চ হাস্যে) জু-জু ভাই, জু-জু, কি  
সৌভাগ্য আমার আপনার দেখা  
পেলাম।

চাকমা—শুনলাম, আপনি নাকি চলে যাচ্ছেন?

স: জা:—পাগল নাকি আমি চলে যাবো? এ  
জিলার মেজর ট্রাইব চাকমাদের সাথে  
দেখা না করে চলে যাবো? এটা বিশ্বাস  
করেন আপনি?

চা:—শুনে খুবই খুশী হলাম। আপনি নাকি  
আমাদের ভাষা নিয়ে গবেষণা করবেন?

স: জা:—একজেরি তাই। কিন্তু আপনাদের  
সাহায্য না পেলে তা কি সম্ভব?

চা—আমি সব দিক দিয়েই আপনাকে সাহায্য  
করবো।

স: জা:—আপনার কথা শুনে খুবই খুশী হলাম,  
ভাই। কি জ্বালাতনেই না পড়েছিলাম।  
কারোর কথাই বুঝতে পারছিলাম না।  
(আনন্দের সাথে আবার জিনিসপত্র  
গুলো টেবিলে রাখলেন)।

চা:—পারবেন। পারবেন। কি জানতে চান  
বলুন।

স: জা:—আচ্ছা, আপনারা কল্পকে কি বলেন?

চা—'হুর'।

স: জা:—(বিনীতভাবে) কি বললেন, ভাই?

চা—(উচ্চস্বরে) হুর।

স: জা:—(আরো বিনীত হয়ে) ডোট মাইণ্ড,  
ব্রাদার। আমি সত্যিই আপনাদের কথা  
শিখতে চাই। বললাম কি কল্প—  
মানে কাছিম। জলে থাকে, ডাঙ্গায়ও  
থাকে। (অঙ্গ ভঙ্গি সহকারে) দেখতে  
গোল, চার পা, মাথা আছে, দরকার  
মত এমনি করে (হাত দিয়ে দেখিয়ে)  
বের করে আবার ছুরত করে গায়ের  
ভিতর ঢুকায় ও। সেই কল্প মানে  
কাছিম.....?

চা—'হুর' 'হুর'।

স: জা:—(রেগে এক লাফে দাঁড়িয়ে) কি  
বললেন? আপনি আমাকে কি  
পেয়েছেন? আমি গরু না ছাগল?  
দূর দূর করছেন যে? তাড়িয়ে দিতে  
চান নাকি? জামার আস্তিন গুটাতে  
গুটাতে) খবরদার! মুখ সামলে কথা  
বলবেন!

চা—কি মশায়, রাগটা আপনার একচেটিয়া?  
আর কারোর রাগ নেই মনে করেন?  
লাট সাহেবের বাচ্চা আর কি! কথার  
কথায় রেগে যান। (দাঁড়িয়ে—গলা  
চড়িয়ে) মারবেন নাকি? ভাল হবে না  
বলে দিচ্ছি!

স: জা:—(একটু নরম স্বরে) আপনি আমার  
দূর, হুর, করছেন যে? কল্পকে  
আপনারা কি বলেন জিজ্ঞাসা করাটা কি  
খারাপ হলো?

চা—এই বিজ্ঞা নিয়ে গবেষণা করতে এসেছেন ?  
শুনুন, মশাই, আপনারা যাকে ‘কচ্ছপ’  
বলেন আমরা তাকে ‘ছন্ন’ বলি,  
বুঝছেন ? নাহ্, এরকম বিজ্ঞা দিগ-  
গজের সাথে কথা বলে লাভ নেই।  
চলি। (ছন্ন-দাম্ পায়ে শব্দ করে  
চলে গেল)

সঃ জাঃ—(হতভম্ব হয়ে চেয়ারে গা এলিয়ে দিয়ে  
অসহায় ভঙ্গিতে) ওহ্, কি বিপাকেই না  
পড়েছি! পদে পদে ভুল হয়ে যাচ্ছে!  
আর তার মাশুল দিতে হচ্ছে কড়ার  
গুণায়! নাহ্, এভাবে গালি খাওয়ার  
চেয়ে পাহাড় অঞ্চলের ভাষা না শেখাই  
ভাল কি দরকার বাবা, অত গালি খেয়ে

ভাষা শেখার। এবার সুযোগ থাকতে  
চলে যাই। না হলে শেষ-মেশ আবার  
কোন উপজাতির খপ্পরে পড়ি—বাবা।  
(তানপুরাটা কাছে টেনে কাঁদো কাঁদো  
গলায় বলতে লাগলেন) কানপুরা  
বাবাজী, আর গান শেখা হলো না।  
কত আশা নিয়ে উপজাতীয় গান  
শিখাবো বলে তোমায় সঙ্গে নিয়ে  
আসলাম—কিন্তু তা আর হলো না।  
হায়! ভাষায় যে এত বিভ্রাট আছে  
তাকি আগে জানতাম।

(তিনি জিনিসপত্র গুছাতে থাকেন আর  
ছোঁজের পর্দা ধীরে ধীরে নেমে আসবে)।

সমাপ্ত

